

氏族典第三百六十二卷

金姓部列傳二

明 金興旺

按明外史金興旺傳興旺不詳所始爲威武衛指揮僉事進同知洪武元年進指揮使守興元擢大都督府僉事蜀將陳友仁寇興元城中兵止三千友仁兵三萬興旺迎戰斬數百人友仁驚遁威震隴蜀國初諸都督中論城守功興旺爲最著云

金朝興

按名山藏勳封記宣德侯金朝興巢人從渡江討閩浙累功都督僉事世指揮屬西平侯討平西蕃洮河戎洪武十二年授開國輔運推誠宣力武臣榮祿大夫柱國侯祿二千石指揮使賜券與誓免二死侯四年以屬潁川侯征雲南卒於會川追封沂國公賜諡武毅十七年使子鎮世侯給券誓免死益祿五百石竟坐黨在死前除

金弘業

按蘇州府志弘業吳縣之下保人方國珍作亂其黨行劫吳中弘業團兵保障子榮三榮四與賊力戰於黃洋灣俱死賊亦氣却一境無恙是時陳氏保其上金氏保其下上保下保之名自此始

金榮三 金榮四

按吳縣志榮三榮四俱弘業子元方國珍亂其黨行劫弘業團兵保障榮三兄弟與賊力戰於黃洋灣俱死

金宣一

按池州府志宣一建德人元末兵亂集眾保鄉里洪武初適堯封時羅友賢復叛遇宣宣數其逆友賢怒刃之其馬負屍歸至鍊帽山始仆因葬其處

金建

按浙江通志建瑞安人有學行隱居不仕以春秋教授鄉里至正間方國珍海艘犯境獻策築城備禦答納失理從其言郡賴以安省府聞其名徵爲祕書勾管不起優游田里自號林居子方氏據郡以禮延致終不屈

金瑤

按休寧縣志瑤字仲善中市人駙馬都尉王克恭來鎮賓之幕府洪武初前朝吏例徙濠州爲農父例當往瑤以父年高請代不許遂願入軍伍元季徼民先隸兵籍後歸農者千餘家主將欲悉籍爲兵瑤潛燬其籍至今邑人義之

金斗

按巢縣志斗乙未歲同諸將和州歸附屢因征討有功授鎮國將軍僉大都督府事卒於官

金文徵

按萬姓統譜文徵字德儒讀書工古文辭洪武初辟爲縣學訓導庚戌領京闈鄉試第二敕免會試授鄆州同知鄆境接川蜀素號難理文徵優爲之時同邑黃綜知中部常熟張著知膚施與文徵皆延安官屬公餘以詩唱酬名長安集仕終國子學錄從兄珉元季訓導長洲洪武中爲國子助教亦有文名

金譯

金詔

按汪溪族譜譯字定遠性資明敏刻厲問學洪武初召見命待選吏部譯以疾告詔授縣丞賜歸所著有遺安集行世 按汪溪族譜詔字彥文性耿介體貌豐偉涉獵書史洪武庚午有司以材薦

詔授登仕郎以老疾辭歸

金璠

子哲童 逢吉

按汪溪族譜璠字彥恭負才氣總制俞懋齋延幕府平定江西贊畫居多子哲童字希魯素慕邵康節之學值靖難兵入遂隱居汪溪吟詠嘯傲學者稱爲汪溪高士次逢吉字希敏徙居江西之永新好學博聞與學士解縉方伯李楨交最善時人以管幼安目之

金良才

金大

金師古

按汪溪族譜良才字子容持身謹厚資稟敏悟自幼好學博涉書史作小楷遒勁有晉風教授閭中後進以爲師表 按汪溪族譜大字弘道淳樸謹恪性嗜學自少至老手不停披洪武初被召詔

送吏部注選托疾歸

按萬姓統譜師古錢塘人洪武初知分水縣修築壇壝教民播種後陞永

州府同知民思之不忘

金綱

按萬姓統譜綱嘉興人元舉鄉試洪武中歷蘇州守百姓苦官民田則不齊里胥爲奸綱上疏請減重額得罪賜死子穎伯從武林俞紫芝遊邃於經學工書爲人清介雅飭學者宗之孫公綬新樂知縣

金雍

按萬姓統譜雍洪武初知清豐縣博學多才爲政有惠愛時兵燹之後擲財用修舉廢墜勸課農桑期年之間民皆安生立業

金華

按萬姓統譜華字宗實鄞人洪武間從戍燕山衛值文皇靖內難守通州有功召見時弟忠以近幸授兵部尙書上欲推恩與華辭不就賜歸徙東湖韓嶺居焉足不履城府日坐斗室寄情經史手點書萬餘卷至老不懈遇朋從往來詩酒爲樂興至泛舟湖上釣月吟風竟夕而返後弟迎養於金臺官舍未浹旬謂曰萬鍾之富其如我湖山樂何遂拂袖而歸永樂乙未忠卒復召見賜白金文綺華

伏闕謝曰臣布衣野人不敢用此上稱爲仙叟一日讀宋鑑至王倫附秦檜事撫掌發歎脫頤而逝人稱爲白雲先生

金純

按明外史宋禮傳金純字德修泗州人洪武中國子監生以杜澤薦授吏部文選司郎中三十一年出爲江西布政司右叅政成祖卽位以蹇義薦召爲刑部右侍郎永樂八年從北征遷左侍郎九年命與宋禮同治會通河還改禮部左侍郎進禮部尙書十九年巡撫四川仁宗卽位改工部居數月又改刑部宣德三年爲言官所劾予致仕去正統五年卒

金澄 金玉鉉

按貴州通志澄宣德侯朝興次子有勇略明洪武間以總兵官同沐英征麓川破賊壘數十長驅直入遂中飛槍事聞優卹 按浙江通志玉鉉開化人常山縣學生洪武間應徵拜官永樂初以直諫死

金幼孜

按明外史金幼孜傳幼孜名善以字行新淦人建文二年進士授戶科給事中成祖卽位改翰林院檢討與解縉同直文淵閣遷侍講十八年拜文淵閣大學士仁宗卽位加太子少保兼武英殿大學士專典內制宣德元年爲總裁官修兩朝實錄六年卒諡文靖子昭伯進士

金問

按明外史解縉傳金問字公素吳人好古嗜學博洽經史永樂初以善書進授司經局正字仁宗在東宮喜問書得侍左右成祖北征歸入漢趙二王譖求宮僚罪過遂繫獄十年仁宗卽位乃出之授翰林修撰每論時政多見采納正統間累官禮部右侍郎子汝進太僕丞

金叔剛

按富陽縣志叔剛字彥真富陽人爲人端方嚴重居家以孝聞親死廬墓三年邑人重之永樂三年以薦擢監察御史駙馬某怙寵專權叔剛三疏奏劾因直言坐死

金輝

按休寧縣志輝璫溪人登永樂進士任江西臨江府推官遇事敏給蒞政詳明持己儉約待人寬恕

尋陞廣東道監察御史以風節著

金忠

按明外史金忠傳忠鄞人善易卜兄戍通州亾忠補戍賣卜燕市市人傳以爲神僧道衍稱於燕王燕王將起兵託疾召忠卜得鑄印乘軒之卦勸王舉大事王深信之遂預密議燕兵起授忠王府紀善守通州進長史燕王稱帝論佐命功擢工部右侍郎贊守北京尋召還進兵部尙書立世子爲皇太子命忠爲東宮輔導官以兵部尙書兼詹事府詹事忠承顧問知無不言然慎密不洩凡承旨調察無不解釋者好善嫉惡處僚友不持兩端退恆推讓之其長厚多如是十三年卒仁宗立追諡忠襄子達官終長蘆都轉運使忠兄華負志節忠欲推恩官之辭不就里中稱爲白雲先生

金玉

按名山藏勳封記惠安伯金玉不詳所始永樂七年以督府僉事從出塞護輜重十八年封伯祿八百石世指揮使

金順

按名山藏勳封記順義伯金順本名阿魯哥失里永樂七年自瓦剌來降授大寧都指揮僉事八年從北征追敗本雅失里阿魯台進同知洪熙元年陞都督府僉事宣德三年從巡北邊有斬捕功四年以舊勞封順義伯祿八百石卒官子忠指揮僉事

金濂

按明外史金濂傳濂字宗瀚山陰人永樂十六年進士授御史宣德初巡按廣東廉能最著改按江西浙江用薦遷陝西副使正統三年擢僉都御史叅贊寧夏軍務八年拜刑部尙書調戶部加太子太保時四方用兵需餉急濂綜核無遺議上撙節便宜十二事國用得無乏景泰五年卒以軍功追封沐陽伯諡榮襄

金忠 金音

按名山藏勳封記忠勇王金忠永樂二十一年以降成祖塞外封忠勇王賜姓名洪熙初加太子太保支二俸宣德四年進太保除 按汪溪族譜音字汝鏞永樂戊子貢入國學值勅修永樂大典

祭酒以音舉入館預編修事後以慈闈老疾乞歸養一時僚友各爲文稱饒

金彥文

按萬姓統譜彥文休寧人生三歲喪父七歲舅奪母志祖子高撫育成童家貧採薪負米以資甘旨祖歿殯葬盡禮母寡居迎歸孝養母病齋禱願以身代母遂愈母卒哀毀逾禮廬墓三年朝夕哭泣忽一夜虎過不害明日人觀其跡驚異之永樂間詔旌其門

金寶

金勝

金英

按萬姓統譜寶開化人有文行尤長於詩歌大學士楊溥深重之永樂中歷官翰林春坊陞衛府左長史有文集行世 按儀真縣志勝高麗人父士滿洪武間安插儀真衛右所副千戶勝襲其職宣德間征交趾陣亡 按明外史金英傳英宣宗朝司禮太監也英宗立與興安並貴幸景泰元年英犯贓罪下獄論死帝令禁錮之終景帝世廢不用

金潤

按萬姓統譜潤字伯玉上元人年十二能賦詩正統間舉鄉貢授兵部司務才敏有識己巳瓦剌入寇上欲親征潤白於尙書鄺埜曰細事未可重煩車駕又請於王翱胡濙乃上疏不報值變後爲少

保于謙所重每諮議兵事寇終遁去京師晏然擢南安知府政暇彈琴寫畫賦詩以子貴乞休家居號洞天十友

金湜

按萬姓統譜湜字本清號太瘦生鄞人幼有異質甫髫鬣輒能詩歌中正統辛酉鄉試授中書舍人陞太僕寺丞憲宗卽位使朝鮮還朝乞致仕屢徵不起居閒二十年足不跡公府湜事親以孝聞居喪盡禮中書時以書法薦弟溥仕至池州守與諸姪分田宅讓肥美人以是高之

金紳

按江寧縣志紳字縉卿伯玉之子景泰甲戌進士以庶吉士改刑科給事中首論門達竊弄威柄力言王竑可屬大事又陳時政八事累陞刑部左侍郎戊戌江西大旱詔往視得便宜行事境賴以寧歷三年始還卒於官

金純

按畿輔通志純平谷人景泰甲戌進士任刑部郎陞桂林知府時猺賊爲亂巡按王浩遣純撫之猺

古今圖書集成
皆聽招事平進階中憲大夫守廣信會永豐銀坑賊起純捕散之陞山西叅政遇旱邊儲告乏設法轉運足濟軍需陞右布政使以疾致仕

金忠

按浙江通志忠字尙義麗水人天順甲申進士授監察御史所至震聲值星變疏陳三事事侵權貴中傷繫獄謫戍遼東怡然就道杜門著書有甕天稿及東甌童子吟

金顯宗 弟顯志

按休寧縣志顯宗字世光偕弟顯志少從師浙地遂入籍嘉興爲名諸生顯宗於書無所不讀尤精天官地志之學性豪邁不羈善知人嘗遠遊買一家僮劉姓者器其聰慧遂教之讀書閱十數年贈百金令其歸籍就試劉得成進士後巡按江南造門事以父禮不許饋之金卻不受著有仰觀考俯察考顯志字閑軒長於詩有閑軒詩集六卷

金德玆

按汪溪族譜德玆字仁本事親修身孝謹有度嗜書成癖務求有得於中所著有務本齋稿道統源

流程朱氏錄

金洪

按浙江通志洪字惟深鄞人郎中亮之子舉成化進士授靖江令旋改令吳江裁抑勢家剷革狡吏吳民德之勢閥以家人冒充勇士費耗月糧奏請裁革瑾怒矯旨爲民瑾誅詔起原職不赴子樸正德丁丑進士仕終職方主事

金洪

按浙江通志洪杭州右衛人事母竭盡孝敬嘗割胸肉愈母疾及歿刻木像工人以血料塗塑洪曰奈何以豬血汚母身刺胸取血盈盂周塗其像朝奉夕侍一如生時忌日悲號哀動鄰里又體母意養貧女弟割產中分之未幾火燬其室獨像纖毫無損扣之有聲成化間有司以事奏聞詔封承德郎洪家四世同爨不異財人皆以爲孝義所致云

金澤

按江寧縣志澤字德潤幼警敏舉成化二年進士累官四川參政轉廣東布政進右副都御史巡撫

江西皆有聲陞南刑部侍郎尋改兵部又進南都察院右都御史致仕澤鎮靜有容得大臣體性孝友門無好事室無姬妾人稱爲全德君子子述以廕叙官至郎中

金爵 金燦

按萬姓統譜爵四川人謙約易諒成化中知鄞縣事節賦省刑民愛之如父母都御史劉敷奏其績擢太僕丞拜刑部尙書諸孫官皆侍從人謂爵盛德昌後云 按萬姓統譜燦字懋光嘉定人爲

人樸魯無威儀而心跡光明不失爲君子人有非義輒正言排之無所避忌尤長於史學仕爲象山訓導

金賢

按江寧縣志賢字士希弘治十五年進士授給事中奉命勘兩淮重獄時閹瑾亂政諸司論讞非取其意旨不敢決賢不少徇瑾恨之出守大名有政聲已而中忌徙延平請老不俟報而歸

金隆顯

按會昌縣志隆顯弘治八年流賊入境隆顯禦之力戰而死事聞於朝嘉其忠義廕其子潤爲石山

驛丞

金獻民

按萬姓統譜獻民字舜舉蘇州人登進士歷官湖廣按察使爲政剛明不避權幸以忤逆瑾罷官尋召入內臺進都御史刑部尙書仍掌院事事持大體不事瑣屑糾劾彈舉臺中肅然進兵部尙書嚴明精察序次武籍犁然不紊

金洲

按萬姓統譜洲字士瀛嘉定人少有志於聖賢之學性至孝居母喪哀毀骨立動不違禮處昆季尤極友愛嘗知永康清廉仁愛一毫不以煩民入覲抵京以病目改國子助教出知高邑不任勞瘁忽嘔血而卒其學以誠敬爲主而析理尤精學者稱爲沐齋先生

金約

按萬姓統譜約字用傳休寧人性溫醇力學好義雅字孤幼迪後學無倦正德丁卯鄉薦母老疏乞教職就養得署河南唐縣教諭士風丕振無何流賊猖熾約集諸生爲有司策城守具身先荷戈乘

古今圖書集成
城堅守彌月賊知有備因夜遁事聞詔褒其忠義遭母憂服闋補江西信豐縣學陞國子助教卒

金琇

按萬姓統譜琇江都人正德初知保康縣廉介正直吏民不敢犯時歲祲兵擾民將竄去乃推誠撫安之士民樂業

金賁亨

按臨海縣志賁亨字汝白號一所正德甲戌登進士教授揚州陞南京刑部主事告歸養親嘉靖壬午補刑曹轉員外郎出僉江西按察司改督學江西既歸杜門讀書性至孝執父喪三年不入私室居鄉一遵古禮年八十有六卒於家子立愛立敬立相俱登嘉靖進士

金克厚

按萬姓統譜克厚仙居人嘉靖三年任六合縣知縣溫雅忠厚有長者風歷工部郎中

金繼震

按休寧縣志繼震字長卿峽東人進士授北直涪令改義烏令擢南禮部主政因在涪時與當道隙